



**SHERIA YA MAREKEBISHO YA MFUKO WA HIFADHI YA  
JAMII YA 2016**

**MPANGILIO WA VIFUNGU**

**VIFUNGU**

**MAELEZO**

**SEHEMU YA KWANZA  
VIFUNGU VYA UTANGULIZI**

1. Jina fupi na kuanza kutumika.
2. Kusomwa.

**SEHEMU YA PILI  
VIFUNGU VYA MAREKEBISHO**

3. Marekebisho ya Kifungu cha 2.
4. Marekebisho ya Kifungu cha 12.
5. Marekebisho ya Kifungu cha 17.
6. Marekebisho ya Kifungu cha 23.
7. Marekebisho ya Kifungu cha 26.
8. Marekebisho ya Kifungu cha 29.
9. Marekebisho ya Kifungu cha 31.
10. Marekebisho ya Kifungu cha 32.
11. Marekebisho ya Kifungu cha 41.
12. Marekebisho ya Kifungu cha 42.
13. Marekebisho ya Kifungu cha 44.
14. Marekebisho ya Jadweli la Kwanza.



SHERIA NAMBA 10 YA 2016

NIMESAINI

*Ali Shein*

{DK. ALI MOHAMED SHEIN}

RAIS WA ZANZIBAR NA MWENYEKITI  
WA BARAZA LA MAPINDUZI

*3 Januari*

....., 2017

**SHERIA YA MAREKEBISHO YA MFUKO WA HIFADHI YA  
JAMII YA 2016 NA MAMBO MENGINE YANAYOHUSIANA NA HAYO**

IMETUNGWA na Baraza la Wawakilishi la Zanzibar.

**SEHEMU YA KWANZA  
VIFUNGU VYA UTANGULIZI**

Jina fupi  
na kuanza  
kutumika.

1. Sheria hii itajulikana kama Sheria ya Marekebisho ya Mfuko wa Hifadhi ya Jamii ya 2016, na itanza kutumika baada ya kutiwa saina na Rais.

Kusomwa.

2. Sheria hii itasomwa pamoja na Sheria ya Mfuko wa Hifadhi ya Jamii, Namba 2 ya 2005 ambayo katika Sheria hii itajulikana kama "Sheria mama".

**SEHEMU YA PILI  
VIFUNGU VYA MAREKEBISHO**

Marekebisho  
ya Kifungu  
cha 2.

3. Kifungu cha 2 cha Sheria mama kinarekebishwa kama ifuatavyo:

(a) Kwa kufuta tafsiri ya neno "mshahara" na kuweka badala yake tafsiri ya neno "mshahara" kama ifuatavyo:

"mshahara" maana yake ni fedha anayolipwa mfanyakazi kwa kutumikia mkataba wake wa ajira"

(b) Kuweka tafsiri mpya ya maneno katika mpangilio wa herufi kama ifuatavyo-



"Mafao ya uzeeni pungufu" maana yake ni malipo ya kila mwezi ya pencheni na kiinua mgongo anayolipwa mwanachama aliyetimiza umri wa kustaafu na kuchangia katika Mfuko kwa muda wa miezi sitini na zaidi, lakini chini ya miezi mia moja na hamsini na sita;

"Wastani wa mshahara wa mwisho" maana yake ni wastani wa mshahara wa miezi sitini bora kati ya miezi mia moja na hamsini na sita ya mwisho wa muda wa uchangiaji;

"Muda wa uchangiaji" maana yake ni idadi ya miezi ambayo michango imelipwa katika Mfuko;

"Uwiano wa rasilimali" maana yake ni jumla ya rasilimali iliyopo mwisho wa mwaka kwa kulinganisha na jumla ya matumizi ya Mfuko katika kipindi cha mwaka husika;

"Ukomo wa kipato" ni kiwango cha juu cha mshahara kitakachotumika kukokotoa pencheni ambacho hupatikana kwa kuzidisha wastani wa mshahara wa kima cha chini wa Serikali mara ishirini na tano.

Marekebisho  
ya Kifungu  
cha 12.

4. Kifungu cha 12 cha Sheria mama kinarekebishwa kama ifuatavyo:

(a) Kuweka nambari upya ya aya ya (f) kuwa aya ya (g) kwa mpangilio;

(b) Kuweka aya mpya ya (f) kama ifuatavyo-

(f) "kuazima fedha kwa njia ya mkopo au njia nyinginezo kwa lengo la kugharimia miradi kwa dhamana na masharti yanayohusiana na kurejesha mkopo huo kama Bodi itakavyoona inafaa".

Marekebisho  
ya Kifungu  
cha 17.

5. Kifungu cha 17(3) cha Sheria mama kinafanyiwa marekebisho kama ifuatavyo:

(a) Kufuta Kifungu kidogo cha (3) na kuweka badala yake kifungu kipya kidogo cha (3) kama ifuatavyo:

(3) "Mchango wa mwanachama na muajiri chini ya kifungu hiki, utawasilishwa na muajiri katika Mfuko kwa utaratibu utakaowekwa ndani ya siku kumi na tano baada ya mwisho wa mwezi husika".

(b) Kuweka Kifungu kidogo kipya cha (4) (a) na (b) kama ifuatavyo-



(4)(a) "Mtu yeyote anayekwenda kinyume na masharti ya kifungu kidogo cha (3) cha kifungu hiki, ametenda kosa na akitiwa hatiani atawajibika kulipa faini isiyopungua milioni tano fedha za kitanzania au kifungo cha muda usiopungua mwaka mmoja au vyote viwili faini na kifungo kwa pamoja";

(b) "pamoja na adhabu itakayotolewa kwa mujibu wa kifungu kidogo cha (4) (a) cha Kifungu hiki, mahakama baada ya kumtia mtuhumiwa hatiani itamuamuru mtuhumiwa huyo kulipa kiwango stahiki cha deni la mchango analodaiwa na Mfuko pamoja na riba iliyopatikana kutokana na deni la mchango huo.

Marekebisho  
ya Kifungu  
cha 23.

6. Kifungu cha 23 (2) cha Sheria mama kinarekebishwa kama ifuatavyo-

kuongeza maneno "kufunga biashara katika muda muafaka" baina ya maneno "kuambatanisha" na "au mauzo".

Marekebisho  
ya Kifungu  
cha 26.

7. Kifungu cha 26 cha Sheria mama kinarekebishwa kama ifuatavyo-

(a) Kwenye Kifungu kidogo cha (1)-

(i) kufuta maneno "kujumuisha mafao na kiinua mgongo" yaliyojitokeza baada ya maneno "umri wa uzeeni" katika aya ya (a) ya kifungu kidogo cha (1) cha kifungu hiki;

(ii) kufuta maneno "kwa ajili ya wategemezi" kilichojitokeza baada ya neno "maslahi ya walio hai" katika aya ya (b) ya kifungu kidogo cha (1) cha kifungu hiki;

(iii) kufuta neno "matunzo" lililojitokeza baina ya neno "tiba" na "maslahi" katika aya ya (e) ya kifungu kidogo cha (1) cha kifungu hiki;

(b) Kufuta kifungu kidogo cha (3) cha kifungu cha 26 na kuweka badala yake kifungu kipya kidogo cha (3) kama ifuatavyo-

(3) "Waziri kwa kushauriana na Bodi, ana uwezo wa kuchelewesha mafao ya aina yoyote kutokana na sababu ambazo atajiridhisha kwamba Mfuko hauna uwezo wa kulipa mafao hayo kwa wakati huo kwa mujibu wa masharti ya Sheria hii".

Marekebisho  
ya Kifungu  
cha 29.

8. Kifungu cha 29 cha Sheria mama kinarekebishwa kama ifuatavyo:

(a) kufuta aya ya (a) ya kifungu kidogo cha (1) cha kifungu hiki na kuweka badala yake aya (a)(i) na (a)(ii) kama ifuatavyo:



(a)(i) mara tu anapostaafu baada ya kufikia umri wa kupokea pencheni;

(ii) bila ya kujali masharti ya aya (a)(i) ya kifungu kidogo cha (1) cha kifungu hiki, mwanachama aliye kwenye utumishi wa nyongeza atastahiki kupata pencheni na kiinua mgongo cha Mfuko baada ya kukamilisha utumishi wake huo wa nyongeza;

(b) Kufuta kifungu kidogo cha (7) na kuweka badala yake kifungu kipya kidogo cha (7) kama ifuatavyo:

(7) "Namna na kiwango cha kulipa mafao yote yaliyotajwa chini ya Sheria hii na jambo jengine lolote linalohusiana na hilo, yataamuliwa kwa Kanuni zitazotungwa na Waziri kwa kushauriana na Bodi".

(c)(i) kufuta nambari "60" iliyojitokeza baina ya neno "angalau" na "miezi" katika kifungu kidogo cha (8) na kuweka badala yake neno "mia moja hamsini na sita";

(ii) kufuta neno "pencheni" lililojitokeza mwisho wa kifungu kidogo cha (8) na kuweka badala yake neno " mafao".

Marekebisho  
ya  
Kifungu  
cha 31.

9. Kifungu cha 31 cha Sheria mama kinarekebishwa kama ifuatavyo-

(a) Kufuta kifungu kidogo cha (2) na kuweka badala yake kifungu kipya kidogo cha (2) kama ifuatavyo-

(2) "Mwanachama aliyetimiza umri wa kustaafu, kupata ulemavu au kufa kabla ya kufikisha kipindi cha miezi sitini cha michango yake kwa Mfuko atastahiki kulipwa marejesho ambayo ni sawa na wastani wa michango ya miezi ishirini na nne bora kwa mafao ya muda mrefu mara idadi ya miezi aliyochangia katika Mfuko".

(b) kufuta Kifungu kidogo cha (3) na kuweka badala yake kifungu kipya cha (3) kama ifuatavyo-

(3) "Mwanachama aliyetimiza umri wa kustaafu, kupata ulemavu au kufa akiwa amechangia chini ya miezi ishirini na nne, atastahiki kulipwa marejesho ambayo ni sawa na jumla ya michango aliyochangia kwa mafao ya muda mrefu".

(c) kufuta kifungu kidogo cha (4) na kuweka badala yake kifungu kipya cha (4) kama ifuatavyo-



(4) "Mwanachama aliyefikia umri wa kustaafu kabla ya kutimiza kipindi cha miezi mia moja na hamsini na sita lakini katimiza zaidi au sawa na kipindi cha miezi sitini, atastahiki kulipwa mafao pungufu ya uzeeni kama ilivyoelezwa katika jadweli la kwanza chini ya Sheria hii".

(d) kuweka kifungu kidogo kipya cha (5) kama ifuatavyo-

(5) "Mafao au marejesho ya warithi yanalipwa kwa warithi au mwakilishi anaetambulika kisheria kulingana na kifungu cha saba cha jadweli la tatu chini ya Sheria hii".

(e) kuweka kifungu kidogo kipya cha (6) kama ifuatavyo-

(6) "Iwapo mwanachama amefanya kazi kwa kipindi fulani na kwa sababu yoyote akasimamishwa kazi, michango ya mwanachama huyo haistahiki kurejeshwa isipokua izuiliwe na Mfuko kusubiri ukokotoaji wa mafao kipindi cha kustaafu, atakapopata ulemavu au kufariki".

(f) kuweka kifungu kidogo kipya cha (7) kama ifuatavyo-

(7) "Waziri anaweza kwa kushauriana na Bodi kuandaa kanuni zitakazowaruhusu wanachama walioacha au kuachishwa kazi kupewa mafao maalum bila kuathiri uendelevu wa Mfuko".

Marekebisho  
ya Kifungu  
cha 32.

**10.** Kifungu cha 32 cha Sheria mama kinarekebishwa kwa kufuta kifungu kidogo cha (2) na kuweka badala yake kifungu kidogo kipya cha (2) kama ifuatavyo-

(2) "Wakati wa maombi ya mafao ya Mfuko yaliyotajwa katika kifungu cha 29 cha Sheria hii, Mkurugenzi Mwendeshaji baada ya kujiridhisha na ushahidi wa maombi hayo, ataidhinisha kiwango cha fedha ambacho mwanachama anastahiki kulipwa".

Marekebisho  
ya Kifungu  
cha 41.

**11.** Kifungu cha 41 cha Sheria mama kinarekebishwa kama ifuatavyo-

(a) kuweka upya nambari ya kifungu cha 41 kuwa nambari mpya ya 41(1)-

(b) kuongeza kifungu kidogo cha (2) kama ifuatavyo-

(2) "Waziri anaweza, kwa kushauriana na Bodi, kuandaa kanuni zitakazowaruhusu wanachama kutumia stahiki ya mafao yao kama dhamana ya mkopo".

(c) kuongeza kifungu kidogo cha (3) kama ifuatavyo-



(3) "Dhamana ya mkopo unaotolewa chini ya kifungu kidogo cha (2) cha kifungu hiki hautozidi asilimia hamsini ya stahiki ya kiinua mgongo katika kipindi cha maombi".

Marekebisho  
ya Kifungu  
cha 42.

**12.** Kifungu cha 42 cha Sheria mama kinarekebishwa kama ifuatavyo-

(a) kuongeza kifungu kidogo cha (3) kama ifuatavyo-

(3) "Mtu yeyote ambaye atashindwa kutekeleza masharti yoyote ya Sheria hii ametenda kosa na akitiwa hatiani atawajibika kulipa faini ya milioni tano fedha za kitanzania au kutumikia kifungu cha muda wa mwaka mmoja au vyote viwili faini na kifungu kwa pamoja".

(b) kuongeza Kifungu kidogo cha (4) kama ifuatavyo:

(4) "Mahakama itamtaka mtu yeyote atakaetiwa hatiani kwa kosa lolote chini ya Sheria hii, bila ya kuathiri shauri lolote linalohusiana na madai, kulipa madeni yatokanayo na michango pamoja na riba au adhabu inayotokana na michango hiyo, iliyothibitishwa kudaiwa na Mfuko katika tarehe ya kutiwa hatiani, na kiwango cha deni hilo lililopatikana kama itavyotowza faini na litalipwa Mfuko kwa ajili ya wanachama husika".

Marekebisho  
ya Kifungu  
cha 44.

**13.** Kifungu cha 44 cha Sheria mama kinarekebishwa kama ifuatavyo:

(a) Kwa kufuta kifungu cha 44(2) na kuweka badala yake kifungu kipya cha 44(2) kama ifuatavyo:

**44. (2)** "Waziri, kwa kushauriana na Bodi, anaweza kutayarisha Kanuni za kuanzisha Mfuko wa hiari kwa ajili ya wafanyakazi walio katika sekta isiyo rasmi, waliojiajiri wenyewe, waliomo katika sekta iliyo rasmi, wastaafu na wazanzibari wanaoishi nje ya Tanzania".

(b) Kifungu kidogo cha (3) kinarekebishwa kama ifuatavyo:

**44.(3)** Waziri kwa kushauriana na Bodi, anaweza kurekebisha jadwali zilizo chini ya Sheria hii".



**JADWELI LA KWANZA**  
**Utaratibu wa Ukokotoaji Mafao**  
**[Chini ya kifungu cha 17 (2)]**

---

Marekebisho  
ya Jadweli la  
kwanza.

**14.** Jadweli la kwanza katika Sheria mama linafutwa na kuwekwa badala yake  
Jadweli jipya la kwanza kama ifuatavyo:

Ukokotoaji  
wa  
Pencheni  
na kiinua  
Mgongo.

**1.-(1)** Pencheni na kiinua mgongo zitakokotolewa kama ifuatavyo:

(a) Kwa mwanachama anaestahiki mafao ya uzeeni-

- (i) Pencheni ni sawa na asilimia thelathini na sita ya wastani wa mwisho wa mshahara. Kutakuwa na ongezeko la asilimia mbili ya wastani wa mwisho wa mshahara kwa kila ziada ya miezi kumi na mbili kutoka miezi mia moja hamsini na sita ya uchangiaji;
- (ii) Kiinua mgongo ni sawa na sitini mara pencheni ya kila mwezi iliokokotolewa katika aya (i) ya kifungu kidogo hiki;
- (iii) Kima cha chini cha Pencheni ni sawa na 30% ya kima cha chini cha mshahara wa Serikali;
- (iv) Ukomo wa mshahara unaweza kutumika katika ukokotoaji wa pencheni.

(b) Kwa mwanachama anaestahiki mafao pungufu ya uzeeni.

- (i) Pencheni ni sawa na asilimia mbili na nusu ya wastani wa mwisho wa mshahara au mshahara unaokubalika kukokotolea pencheni kwa kila miezi kumi na mbili iliyokamilika;
- (ii) Kiinua mgongo ni sawa na themanini mara pencheni ya kila mwezi iliokokotolewa katika aya (i) ya kifungu kidogo hiki;
- (iii) Ukomo wa mshahara unaweza kutumika katika ukokotoaji wa pencheni.

(c) Kwa mwanachama anaestahiki mafao ya ulemavu:

- (i) Pencheni ni sawa na asilimia mbili na nusu ya wastani wa mwisho wa mshahara kwa kila miezi kumi na mbili iliyokamilika;





- (ii) Kiinua mgongo ni sawa na themanini mara pencheni ya kila mwezi iliokokotolewa katika kifungu (i) ya kifungu kidogo hiki;
- (iii) Kima cha chini cha Pencheni ni sawa na 30% ya kima cha chini cha mshahara wa Serikali;

(iv) Ukomo wa mshahara unaweza kutumika katika ukokotoaji wa pencheni.

(d) Kwa mwanachama anaestahiki mafao ya urithi.

Kiinua mgongo ni sawa na asilimia ishirini ya wastani wa mshahara wa mwisho mara muda wa kuchangia.

Mgawanyo  
wa  
Mafao.

2. Fedha zinazochangiwa na mwanachama na mwajiri zitagawanywa kwa ajili ya-

- (a) Mafao ya uzeeni, urithi na ulemavu 17.0%
- (b) Mafao ya uzazi 1.0%
- (c) Mafao ya matibabu 2.0%

**JUMLA 20.0%.**

Viwango  
vya  
Michango.

3. Viwango vya michango vitakuwa:

- (a) kila mwanachama atachangia Mfuko asilimia saba ya mshahara wake wa mwezi na muajiri anapaswa kukata mchango huo kutoka katika mshahara wa muajiriwa wake.
- (b) kila muajiri atapaswa kuchangia asilimia kumi na tatu itakayokokotolewa kutoka katika jumla ya mshahara wa mwezi anaolipwa mwajiriwa.

**Umepitishwa** na Baraza la Wawakilishi la Zanzibar, tarehe 28 Novemba, 2016.

**RAYA ISSA MSELLEM**  
**KATIBU, BARAZA LA WAWAKILISHI**  
**ZANZIBAR**